

REGLUGERÐ fyrir Hjúkrunarskóla Íslands.

I. KAFLI

Markmið og stjórn skólans.

Yfirstjórn.

1. gr.

Skólinn heitir Hjúkrunarskóli Íslands. Hann er heimavistarskóli og starfar undir yfirstjórn menntamálaráðherra.

2. gr.

Markmið skólans er að veita nemendum sínum hjúkrunarfræðimenntun samkvæmt kröfum hvers tíma og að efla andlegan þroska þeirra og hæfni til hjúkrunarstarfa.

3. gr.

Stjórn skólans annast 5 manna skólanefnd. Í nefndinni eiga sæti: Landlæknir, sem er formaður nefndarinnar, hjúkrunarforstjóri Landspítalans og 3 aðrir, sem ráðherra skipar, einn samkvæmt tillögu Hjúkrunarfélags Íslands, annan samkvæmt tillögu Læknafélags Íslands, og hinn þriðja án tilnefningar, og skal hann vera sérfróður um skólamál. Skólastjóri skal sitja fundi skólanefndar og hafa þar tillögurétt.

4. gr.

Hlutverk skólanefndar er að vera skólastjóra til ráðuneytis um mikilvæg atriði varðandi stjórn skólans, fylgjast með þróun á sviði menntunar hjúkrunarfræðinga, gera tillögur um stefnumörkun í málefnum skólans, stuðla að sem nánustum tengslum hans við heilbrigðisþjónustuna og gera tillögur um breytingar á reglugerð skólans, ef ástæða þykir til. Þá skal nefndin fjalla um umsóknir um skólastjóra- og kennarastöður og senda menntamálaráðuneytinu.

Formaður skal kveðja skólanefnd til fundar þegar þurfa þykir og eigi sjaldnar en tvisvar á ári. Auk þess skal skólanefnd sitja a. m. k. einn fund á ári með kennurum skólans. Formaður skal einnig boða til fundar í nefndinni, ef 2 nefndarmenn, skólastjóri eða þriðjungur fastra kennara æskja þess. Ályktun fundar er því aðeins gild að 3 nefndarmenn eða varamenn þeirra saki fundi. Skólastjóri skal leggja fyrir skólanefnd skrá yfir skólahald og námsefni og gengur nefndin úr skugga um, að það sé í samræmi við þróun hjúkrunarfræðimenntunar hvers tíma.

II. KAFLI

Um skólastjóra, kennara og annað starfsfólk.

5. gr.

Menntamálaráðherra setur og skipar skólastjóra og kennara að fengnum tillögum skólanefndar og eru þeir embættismenn ríkisins, sbr. lög nr. 57/1978 um embættisgengi kennara og skólastjóra.

Þeir einir geta fengið skipun í skólastjóra- og kennarastöður við skólann sem hafa: Háskólapróf í kennslugrein sinni eða viðurkennt hjúkrunarkennarapróf ásamt fullgildum prófum frá skóla, sem menntamálaráðuneytið viðurkennir, og minnst 30 námseiningar í uppeldis- og kennslufræði.

6. gr.

Heimilt er að ráða kennslustjóra án kennsluskyldu og yfirkennara og deildarstjóra með kennsluafslætti vegna stjórnunarstarfa.

7. gr.

Skólastjóri hefir yfirumsjón með kennslu og annarri starfsemi skólans. Hann er fulltrúi skólans gagnvart mönnum og stofnunum innan hans og utan. Hann ber ábyrgð á því að starfsemi skólans sé í samræmi við lög, reglugerð og námsskrár. Hann er ábyrgur um samskipti við yfirvöld skólans og aðra opinbera aðila, þ. á m. um fjárreiður og reikningshald, svo og skipulag, áætlanagerð vegna reksturs og framkvæmda í skólanum. Hann hefir yfirumsjón með eignum skólans, lausum og föstum. Skólastjóri tekur ákvarðanir í málum, er varða stjórnun skólans, ef þau eru ekki falin öðrum aðilum í lögum eða reglugerð.

Skólastjóri ræður með samþykki ráðuneytis starfsfólk skólans annað en fastráðna kennara.

8. gr.

Yfirkennari er staðgengill skólastjóra og aðstoðar við daglega stjórn og rekstur skólans. Hann hefur yfirumsjón með verklegu námi og annast áætlanagerð og skýrsluhald þar að lútandi.

Kennslustjóri annast þann hluta af daglegri stjórn og rekstri skólans sem lýtur að kennslu og nemendum, gerir tillögur um ráðningu stundakennara, annast áætlanagerð, skýrsluhald og gerð stundaskráa og próftöflu. Kennslustjóri er deildarstjóri í þeim greinum, þar sem ekki er deildarstjóri.

Skólastjóri, yfirkennari og kennslustjóri mynda skólastjórn.

9. gr.

Deildarstjóra skal ráða í kennslugreinir eða greinaflokka og skal þess gætt að allar kennslugreinar falli undir einhvern deildarstjóra. Deildarstjórar eru ráðnir úr hópi fastra kennara við skólann. Skólastjóri ræður deildarstjóra með samþykki menntamálaráðuneytis og skólanefndar. Deildarstjóri skal hafa umsjón með kennslu og kennslutækjum í þeim greinum, sem undir hann falla. Hann velur kennslubækur og ákvarðar yfirferð námsefnis í hverri önn í samráði við aðra kennara og kennslustjóra, sem sker úr, ef ágreiningur verður.

Hann skal ásamt öðrum kennurum fylgjast með nýjungum í kennslugrein sinni og gera tillögur um breytingar á námskrá.

10. gr.

Umsjónarkennara skal skólastjóri ákveða í upphafi skólaárs til þess að hafa umsjón með hópi 25—30 nemenda og er öllum kennurum skólans, er gegna fullu starfi, skylt að taka þessa umsjón að sér.

Aðalmarkmiðið með starfi umsjónarkennara er að veita nemendum aðstoð í daglegu starfi þeirra og er umsjónarkennari trúnaðarmaður þeirra nemenda sem hann hefur umsjón með. Umsjónarkennari annast upplýsingamiðlun til nemenda, skýrir þær reglur sem gilda um skólastarfið, hefur milligöngu um þjónustu við nemendur og aðstoðar við lausn vandamála, sem snúa að námi eða einkahögum.

Umsjónarkennari er talsmaður nemenda sinna gagnvart öðrum kennurum og yfirstjórn skólans. Umsjónarkennarar skulu gera sér far um að efla félgsleg tengsl innan nemendahópsins og stuðla að samstöðu hans.

11. gr.

Deildarstjórafundur er skólastjórn til ráðuneytis um starfsemi skólans, hann situr skólastjóri, yfirkennari, kennslustjóri og deildarstjórar.

Deildarstjórafundur úrskurðar um mál er varða breytingar á námsskipan og kennsluháttum, tilhögun prófa, endurtekningu prófa, svo og önnur málefni skólans og nemenda sem ekki eru sérstaklega falin skólastjórn eða alm. kennarafundi.

12. gr.

Kennarafundur fjallar almennt um mál sem varða breytingar á námsskipan og kennsluháttum og gerir tillögur varðandi tilhögun prófa og námsmat. Skal jafnan leita álits kennarafundar áður en teknar eru veigamiklar ákvarðanir í slíkum efnum. Skólastjórn getur og ákveðið að skjóta öðrum málum til umsagnar kennarafundar. Kennarafundur getur á sama hátt vísað málum til skólastjórnar eða deildarstjórafundar. Kennarafundur kysir við upphaf hverrar haustannar 1 áheyrnarfulltrúa til setu á skólanefndarfundum og er kjörtímabil hans tvær annir í senn. Endurkjör er heimilt. Skólastjóri boðar til kennarafunda. Skyld er að halda kennarafund, ef þriðjungur fastra kennara óskar þess. Skyld er föstum kennurum að sækja kennarafundi að forfallalausum, enda séu fundirnir haldnir á eðlilegum starfstíma skólans og boðaðir í tæka tíð. Stundakennurum er skyld að sækja fundi ef skólastjóri óskar þess, enda hafi þeir þá atkvæðisrétt. Rétt til að sitja kennarafundi hafa einnig 2 nemendur úr samstarfsnefnd nemenda og kennara. Skólastjóri undirbýr eða lætur undirbúa mál er fyrir kennarafund koma, en öllum sem seturétt eiga á fundinum, skal heimilt að leggja þar fram mál. Skólastjóri sér um að samþykktum kennarafunda sé komið á framfæri við rétta aðila, nema fundurinn ákveði að hafa annan hátt á. Halda skal gerðabók um kennarafundi.

13. gr.

Heimilt er að stofna samstarfsnefnd nemenda og kennara. Kennarafundur kysir 2 kennara, auk þess á kennslustjóri sæti í nefndinni.

Nemendur kjósa 3 fulltrúa, einn úr hverjum hópi.

Hlutverk nefndarinnar er:

1. að vinna að bættu námi,
2. að skapa jákvætt viðhorf nemenda til náms og skólans,
3. að leysa úr ágreiningsmálum, sem upp kunna að koma,
4. að skapa nánari tengsl og jákvæðan skilning milli kennara og nemenda.

14. gr.

Um störf fastráðinna kennara við skólann, svo og annarra starfsmanna hans, kennsluskyldu og launakjör, gilda ákvæði kjarasamninga eins og þau eru á hverjum tíma.

15. gr.

Nú hefur kennari gegnt embætti í 10 ár og óskar eftir að hverfa frá starfi í hálf tæða heilt ár til þess að efla þekkingu sína og kennarahæfni, skal hann þá senda menntamálaráðuneytinu beiðni um orlof ásamt greinargerð um það, hvernig hann hyggst verja orlofi sínu. Ef ráðuneytið telur greinargerð umsækjanda fullnægjandi, getur það veitt honum orlof á fullum launum. Beiðni um orlof skal senda menntamálaráðuneytinu fyrir 1. nóvember næsta skólaár á undan. Menntamálaráðuneytið veitir kennurum er þess óska, leiðbeiningar um hvernig orlofi skuli varið, en allir verða þeir að gefa ráðuneytinu fullnægjandi skýrslu að orlofi loknu, að viðlögðum launamissi.

16. gr.

Heimilt er menntamálaráðuneytinu að veita kennara leyfi frá kennslu á fullum launum, til þess að vinna að samningi eða útgáfu kennslubóka eða kennslugagna.

Umsókn um slíkt leyfi skal berast með minnst hálfis árs fyrirvara og vera studd meðmælum skólastjórnar og skólanefndar. Umsóknir skulu að jafnaði afgreiddar fyrir 15. júní sama ár.

III. KAFLI

Inntökuskilyrði.

17. gr.

Inntökuskilyrði skólans eru samkvæmt lögum um H.S.Í. nr. 35/1962:

1. Umsækjandi skal vera fullra 18 ára og ekki eldri en 30 ára, er skólavist hefst. Þó getur skólanefnd veitt undanþágu frá þessu ákvæði, ef sérstaklega stendur á.
2. Umsækjandi má ekki hafa næman sjúkdóm eða kvilla, sem öðrum geti stafað hætta af eða orðið honum til trafala í námi eða starfi.
3. Umsækjandi skal hafa góða framkomu og óspillt siðferði.
4. Umsækjandi skal hafa lokið landsprófi miðskóla, gagnfræðaprófi eða hlotið hliðstæða menntun.

Umsækjendur, sem hlotið hafa frekari menntun, skulu ganga fyrir að öðru jöfnu.

5. Heimilt er skólanum að láta umsækjendur ganga undir inntökupróf í einstökum námsgreinum. Ennfremur má úrskurða inngöngu nemenda í skólann með hæfnisprófi.

18. gr.

Umsóknir skulu sendar skólastjóra og úrskurðar hann um þær ásamt yfirkennara og kennslustjóra. Sé um vafaatriði að ræða skal hann leita álits skólanefndar.

IV. KAFLI

Námstími og námsefni.

19. gr.

Námstími skólans skal vera 3 ár, 6 námsannir, þar með talin skólaleyfi. Námið er bæði bóklegt og verklegt og lýkur hverri önn með námsmati. Verklegt nám fer að mestu fram á heilbrigðisstofnunum.

20. gr.

Kennsla fer fram samkvæmt námsskrá, sem menntamálaráðuneytið gefur út og kveður hún á um kennslugreinar, námsefni og stundafjölda í hverri grein.

V. KAFLI

Próf, einkunnir og annað mat á námsárangri.

21. gr.

Próf eða annað námsmat skal fara fram í lok hverrar annar í þeim námsgreinum, sem skólastjórn og deildarstjórar ákveða. (Sjá 23. gr.)

22. gr.

Einkunnir skulu gefnar í heilum tölum og hálfum, frá 0—10 í bóklegu námi, en í verklegu námi er hæfni nemandans metin í orðum.

Fullnægjandi — ófullnægjandi.

23. gr.

Á lokaprófi hverrar annar þarf lágmarkseinkunnina 6 í hjúkrunarfræðigreinum og í heilsugæslu. Í öðrum námsgreinum þarf lágmarkseinkunnina 5. Til þess að standast lokapróf skólans þarf einkunnina 6 í aðaleinkunn. Aðaleinkunn skal finna með því að taka meðaltal af einkunnum allra námsgreina og skal hún reiknast með einum aukastaf.

Aðaleinkunnir: 6 —7,2 teljast 2. einkunn

7,3—8,9 teljast 1. einkunn

9 —10 teljast ágætiseinkunn.

24. gr.

Kennarar semja og fara yfir prófverkefni í samráði við deildarstjóra og kennslustjóra.

25. gr.

Menntamálaráðuneytið skipar prófdómara að fengnum tillögum skólastjóra. Prófdómari fer yfir úrlausnir, ef einkunn er 6 eða lægri í hjúkrunarfræðigreinum og heilsugæslu, og ef einkunn er 5 eða lægri í öðrum námsgreinum.

Verði ágreiningur um einkunn, skal taka meðaltal af einkunnagjöf kennara og prófdómara.

26. gr.

Standist nemandi ekki próf í einni eða tveimur námsgreinum, má hann endurtaka það síðar. Falli nemandi í fleiri greinum, skal skólastjórn og deildarstjórar ákveða hvort hann fær að endurtaka fleiri próf, endurtaka önnuna eða hann úrskurðast hættur í skólanum.

Ekki má endurtaka próf oftari en einu sinni.

27. gr.

Pegar prófum og mati á þeim er lokið, skal skólinn gefa nemendum kost á að skoða prófúrlausnir og einkunnagjöf kennara. Komi fram skekkja á einkunnagjöf eða mati, skal slíkt leiðrétt. Ef nemandi eða forráðamaður nemanda sættir sig ekki við mat og einkunnagjöf kennara skal viðkomandi kæra það til skólastjóra innan þriggja daga frá prófsýnidegi. Skólastjóri hlutast þá til um að skipaður verði prófdómari er endurmetur prófúrlausnir nemandans. Prófdómari skal eiga aðgang að prófúrlausnum annarra nemenda er tóku prófið á sama tíma í skólanum.

28. gr.

Í lok hverrar annar fær nemandinn afhentar prófeinkunnir sínar og/eða námsmat.

Nemandi sem lokið hefur hjúkrunarprófi frá skólanum fær prófskírteini er sýnir loka-einkunnir þær er hann hefur hlotið svo og aðaleinkunn. Skírteinið skal undirritað af skólastjóra og formanni skólanefndar. Nemandi sem lokið hefur hjúkrunarprófi á rétt á hjúkrunarleyfi. Hann á einnig rétt á að bera merki skólans.

VI. KAFLI

Um reglu og aga.

29. gr.

Reglur og agi skulu miða að því að gera skólann að þægilegum vinnustað. Kennarar og nemendur skulu rækja störf sín af alúð og árverkni.

1. Nemendur skulu sækja allar kennslustundir og koma stundvíslega til kennslu.
2. Séu fjarvistir nemenda meiri en 5% í námsgrein sem ekki er prófað í, fæst hún ekki viðurkennd.

Séu fjarvistir nemenda meiri en 20% í öðrum námsgreinum, eru þær ekki viðurkenndar til prófs.

3. Veikindi, sem standa lengur en 3 daga skal staðfesta með læknisvottorði.
4. Fjarvistir vegna veikinda eða annarra forfalla hafa ekki áhrif á fjarvistarreglur nr. 1 og 2.

30. gr.

Pegar próf er tekið, skal þess gætt, að svo rúmt sé um próftaka, að nægjanlegu eftirliti sé unnt að koma við, svo að upplýsingar um prófverkefni berist ekki milli próftaka.

Í prófstofu skulu eigi vera aðrir viðstaddir en próftakar og eftirlitsmenn eða eftirlitsmaður. Verði próftaki uppvis að **óleyfilegu framferði** í prófi, hefur hann glatað rétti sínum til að ljúka prófi í greininni í það sinn og skal vísa honum tafarlaust frá prófi.

Pykir próftaka eitthvað ógreinilegt í verkefninu, getur hann snúið sér til eftirlitsmanns. Í prófum skal kennari í prófgrein vera til taks, en þó eigi sitja yfir í prófum.

31. gr.

Nemendum er skylt að takast á hendur umsjón í skólanum eftir fyrirmælum skólastjórnar.

32. gr.

Nú veldur nemandi skemmdum á eignum skólans og ber honum þá að bæta þær samkvæmt mati eða greiða viðgerðarkostnað.

33. gr.

Nemendur, kennarar og aðrir starfsmenn skólans mega ekki við störf skólans hafa áfengi eða önnur vímuvaldandi efni um hönd, né koma til starfa undir áhrifum þeirra. Brot gegn þessu getur valdið stöðumissi eða brottvísun úr skóla.

Ber skólastjórn að taka tafarlaust til meðferðar mál af þessu tagi og vísa til menntamálaráðuneytisins, ef um alvarleg eða ítrekuð brot er að ræða.

34. gr.

Um önnur þau mál, sem skólastjórn telur að flokkist undir reglu og aga, setur hún sérreglur. Sama gildir, ef talin er þörf á nánari ákvæðum en að framan getur. Leita skal staðfestingar menntamálaráðuneytisins á slíkum reglum.

VII. KAFLI

Framhaldsnám og námskeið.

35. gr.

Skólanum skal heimilt, að fenginni sérstakri fjárveitingu, að veita framhaldsmenntun í hjúkrunarfræðum. Skulu nemendur þessir þreyta próf að námi loknu og fá viðurkenningu skólans fyrir.

VIII. KAFLI
Um heilsuvernd.

36. gr.

Menntamálaráðuneytið ræður í samráði við skólastjóra og skólanefnd skólalækni og heilsugæsluhjúkrunarfræðing og ákveður þeim þóknun fyrir starfann. Þeir skulu hafa eftirlit með heilbrigði nemenda og hollustuháttum í skólanum.

Um heilbrigðiseftirlit í skólanum fer eftir ákvæðum í heilbrigðisreglugerð sem gefin var út af heilbrigðis- og tryggingamálaráðuneytinu 1972.

IX. KAFLI
Fjármál.

37. gr.

Um fjármál skólans fer eftir gildandi lögum, reglugerðum og opinberum fyrirmælum á hverjum tíma.

38. gr.

Reglugerð þessi er sett samkvæmt lögum nr. 35/1962 um Hjúkrunarskóla Íslands, og fellur þá úr gildi reglugerð fyrir Hjúkrunarskóla Íslands frá 19. nóvember 1966.

Reglugerð þessi öðlast þegar gildi og kemur til framkvæmda eins fljótt og við verður komið samkvæmt ákvörðun ráðuneytisins.

Menntamálaráðuneytið, 4. maí 1983.

Ingvar Gíslason.

Birgir Thorlacius.

REGLUGERÐ

um ráðstöfunarfé örorku- og ekkjulífeyrisþega á dvalarstofnunum.

1. gr.

Örorku- eða ekkjulífeyrisþegi sem dvelst langdvölum á stofnun, þannig að lífeyrir hans hefur verið felldur niður, samkvæmt ákvæðum 5. mgr. 51. gr. laga um almannatryggingar nr. 67/1971, skal engu að síður njóta ráðstöfunarfjár frá almannatryggingum. Fjárupphæð þessi sem frá og með marsmánuði 1983 er 936 kr. hækkar í áföngum og verður frá og með 1. júní 1983 1.113 kr.

2. gr.

Fjárhæðir skv. 1. gr. breytast eftir sömu reglum og fjárhæðir bóta almannatrygginga sbr. 79. gr. laga um almannatryggingar nr. 67/1971.

3. gr.

Reglugerð þessi er sett með vísun til 51. gr. laga um almannatryggingar nr. 67/1971 og með hliðsjón af lögum um málefni aldraðra nr. 91/1982 og öðlast þegar gildi.

Heilbrigðis- og tryggingamálaráðuneytið, 14. apríl 1983.

Svavar Gestsson.

Páll Sigurðsson.